

新元史

第五三册

列傳第一百十四

新元史卷之二百十七

賜進士出身日講起居注官翰林院侍讀國史館纂修膠州柯劭忞撰

李黼

韓準

泰不華

樊執敬

汪澤民

福壽

賀方

褚不華

普化帖木兒

劉鶚

李黼字子威潁州人父守中工部尙書守中遇諸子嚴每飲酒輒半月醉不解黼百計承順跪而自訟常達旦不寐泰定四年進士及第授翰林修撰明年代祠西嶽公燕黼坐省臣上省臣曰勅使每後我今可易邪黼曰

王人雖微序於諸侯之上春秋之義也省臣不能對改河南行省檢校官遷禮部主事拜監察御史首言禴祠烝嘗古今大祭今太廟惟一祭而日享佛祠神御非禮也宜據經典行之成均教化之基不當隸集賢宜中書省領之諸侯王歲賜宜有定額分封易代之際陳請恩例世系親疏無成書可考宜倣先代修正玉牒皆不報轉江西行省郎中入爲國子監丞遷宣文閣鑒書博士兼經筵官尋中書省命黼巡視河渠黼上言曰蔡河源出京西宋以轉輸之故平地作堤今河底填淤高出地面秋霖一至橫潰爲災宜按故迹修浚他日東河或有

不測之阻江淮運物可分道達於京師此萬世之利也
亦不報遷祕書太監拜禮部侍郎勅詳定中外所上封
事已而廷議內外官通調授黼江州路總管至正十一
年夏五月盜起陷蘄黃焚掠數千里造船江北岸銳意
南攻江州爲大江咽喉之地黼治城濠募丁壯分守要
害且上攻守策於江西行省請屯兵江北以扼賊衝不
報黼歎曰吾不知死所矣十二年正月賊將趙普勝渡
江陷武昌威順王及省臣相繼遁去賊船蔽江而下遂
陷瑞昌右丞孛羅帖木兒亦遁黼雖孤立然志氣愈壯
黃梅縣主簿也先帖木兒願出擊賊黼大喜向天洒酒

與之誓時賊已至黼軍倉卒無號墨士卒面以統之出戰黼身先士卒也先帖木兒繼之賊大敗逐北六十里鄉丁依險阻遏賊歸路殺獲二萬餘人黼計賊不利於陸必由水道來薄乃冒鐵椎於木杪植沿岸水中逆刺賊舟謂之七星椿會西南風急賊舟揚帆至遇椿莫能動倉惶失措官軍發火箭射之焚溺無算行省上黼功拜江西行省參知政事江州南康等處軍民都總管便宜行事普勝屢敗憤甚乃益兵環攻之黼守孤城提孱兵無日不與賊戰中外援絕二月賊薄城下平章政事禿堅不花啟北門遁黼引兵登陴賊已至甘棠湖焚西

斤已於冬十二月可專

黃賊入江西平章以下皆遁獨準與右丞章伯顏固守相持五十四日賊卒敗退十八年陳友諒陷龍興來見準準面壁卧友諒曰向爲縣吏已知公名準不答展轉遁至福建拜江西行省參知政事準志在收復輿疾以往寓於順昌旋改行臺治書侍御史遂上章告老以行省左丞致仕旣而順昌亦陷準籍藁堂下以喪禮自處有疾不服藥而卒年七十三

泰不華字兼善伯牙吾台氏初名達普化文宗賜以今名世居白里山父塔不台入直宿衛厯台州錄事判官遂家台州家貧好讀書集賢待制周仁榮養而教之登

進士第授集賢修撰轉秘書監著作郎拜江南行臺監察御史時御史大夫脫歡貪暴泰不華劾罷之文宗建奎章閣學士院擢爲典籤改中臺監察御史惠宗卽位加文宗皇后太皇太后之號泰不華率同列上疏爭之太后怒欲殺言者泰不華語衆曰此事我自發之不敢累諸公已而太后怒解賜金幣以旌其直出僉河南廉訪司事俄移淮西又遷江南行御史臺經歷辭不赴轉江浙行省左右司郎中浙西大水言於中書省免其租擢秘書監改禮部侍郎至正元年授紹興路總管除沒官牛租令民自實田以均賦役行鄉飲酒禮教民興讓

民德之召入史館與修遼金宋三史書成授秘書卿改
禮部尙書兼會同館事八年台州黃巖民方國珍作亂
劫掠漕運詔江浙參政朵兒只班總舟師捕之官軍自
相驚潰朵兒只班被執爲所逼奏國珍乞降朝廷從之
國珍兄弟皆授官國珍仍不肯赴勢益橫九年詔泰不
華察其事泰不華上招捕之策不聽尋除江東道廉訪
使改侍講學士知制誥同修國史出爲都水庸田使十
年十二月國珍寇沿海諸路十一年二月詔李羅帖木
兒爲江浙行省左丞總兵至慶元遷泰不華浙東道宣
慰使都元帥分兵温州夾攻賊師未發賊寇温州泰不

華縱火筏焚之遁去孛羅帖木兒與泰不華約以六月乙未合兵進討壬辰孛羅帖木兒先期至大閭洋兵敗被執國珍飾詞上聞泰不華聞之痛憤數日不食帝復遣大司農達識帖木兒等至黃巖招之國珍兄弟皆登岸羅拜是夕泰不華欲命壯士襲殺之密白於達識帖木兒達識帖木兒曰我奉詔招降國珍君欲擅殺乎乃檄泰不華至海濱散其部眾授國珍兄弟官尋遷台州路達魯花赤十二年國珍兄弟復入海叛泰不華發兵扼澄江遣義士王大用至賊所示約信使其來歸國珍留大用以小舸二百突入舟港泰不華語眾曰吾以書

生致位顯貴誠恐負所學汝輩助我討賊克則汝功不克則我死以報國衆皆踴躍請行時賊將陳仲達往來計議僞言賊可降泰不華率衆張受降旗乘潮而至與賊船遇呼仲達申前議仲達色變泰不華知有異卽手斬之直前攻賊船射死五人殺登船賊二人賊欲擁泰不華過船泰不華瞋目叱之奪其刀復殺二人賊攢槩刺之中頸死猶植立不仆賊投其屍于海年四十九時十二年三月庚子也其家僮抱琴及臨海尉李輔德干戶赤盞義士張君璧皆死之泰不華死後除江浙行省參知政事行台州路達魯花赤事不及聞命後二年追

贈榮祿大夫江浙行省平章政事柱國封魏國公諡忠
介立廟台州賜額崇烈泰不華爲人尙氣節初太平爲
臺臣劾貶泰不華獨餞送都門外太平曰公且止無以
我故累公泰不華毅然不從後雖爲時相所擯斥人皆
義之篆書溫潤遒勁師徐鉉張有稍變其法自成一家
著重訂復古編十卷行於世

樊執敬字時中濟甯鄆城人少穎敏好學由國子生擢
授經郎見帝師不拜或問之曰帝師天下所崇重王公
大臣見必俯首爲禮君獨不拜何也執敬曰吾孔氏之
徒豈拜異教者厯官至侍御史至正七年擢山南道廉

訪使移湖北道十年拜江浙行省參知政事十二年二月督海運于平江將發官宴犒有客船自外至驗其券信不虞乃海寇也入港卽縱火燔民居時變起倉卒軍民擾亂賊劫糧以去執敬走崑山及還省而江西之賊已至昱嶺關平章政事月魯帖木兒引軍拒之賊不得進會月魯帖木兒以疾卒賊遂破昱嶺關犯餘杭執敬與平章政事定定治事省中掾吏蘇友龍素伉直進言於執敬曰賊且至城內空虛無備柰何執敬曰吾當殺賊報國倘不克有死而已何畏哉俄賊入執敬上馬率眾出中途遇賊射死二人賊逐之又射死三人已而賊

來愈眾呼執敬降執敬怒叱曰逆賊守關吏不謹汝得至此恨不碎汝萬段何降也中槍墜馬僕田也先馳救之亦中槍與執敬俱死事聞贈翰林學士承旨榮祿大夫柱國追封魯國公諡忠烈

汪澤民字叔志甯國宣城人少警悟家貧力學登延祐五年進士第授同知岳州路平江州事州民李甲死其妻誓不改適兄利其財使人誣以姦私婦不勝撈掠自誣服澤民至廉知其枉而直之朝廷徵江南包銀府檄澤民分辦民不擾而事集秩滿題春帖云及瓜當此日行李似來時人以爲信然尋遷南安路總管府推官萬

戶朵兒赤跋扈自用其府吏擅笞大庾令令訴於府同官不敢發一辭澤民獨捕府吏下獄朵兒赤賂行臺御史召澤民詰之澤民曰姦吏路人皆知公欲翫法耶卒治其罪潮州府判官錢珍挑推官梁楫妻不從誣楫冒羅官米殺之事連廉訪副使劉安仁逮繫二百餘人中書檄澤民訊之獄具珍自殺詔戮其屍安仁坐受賕除名江西湖東道廉訪使聞其名命巡南安贛州二路事得專決旋擢信州路總管府推官丁內艱服除授平江路總管府推官僧淨廣與他僧有隙一日邀廣飲其弟子夜殺廣而誣他僧殺之他僧誣服獄上澤民閱其刀

有鐵工名召工問之乃其弟子佩刀遂釋他僧而置弟子於法嘉定土豪朱管二姓爲姦利澤民與總管道童籍其家及徵帳簿備列官吏受賕數惟澤民與道童名下疏曰不受丁母憂去官服闋起濟甯路兗州知州衍聖公階三品澤民奏請增其品級以示褒崇先聖之意廷議躋之至正三年入爲翰林待制與修遼宋金三史書成遷國子司業集賢學士階大中大夫未二月卽移書告老大學士和尚曰集賢翰林養老尊賢之地先生遽去何也澤民曰吾以布衣榮叨三品志願已足尙何求邪遂以禮部尙書致仕歸十三年蘄黃盜起廉訪使

道童問計於澤民告以收人心振士氣築城濬濠儲糧簡卒凡數十事寇再至皆卻之十六年夏六月長鎗叛帥瑣南班程述等渡江欲襲宣城城中兵不滿數百或勸澤民避去廉訪使木八沙周伯琦亦以爲言澤民曰昔江萬里寓鄱陽大兵來猶坐守不去況父母之邦乎軍費不給澤民從容一言獲鈔萬錠米三千斛八月江浙行省參政吉尼哥兒遣兵來援城中恃援至守懈賊乘夜攀堞以上城陷執澤民逼之降罵賊不屈遂遇害年八十三瑣南班等敬其節具衣冠葬之事聞贈資善大夫江浙行省左丞上護軍追封譙郡公諡文節子用